

近代詩鈔

二十一

近代詩集

三

近代詩鈔

何振岱

振岱字梅生一字心與福建閩縣人光緒丁酉科舉人
有姑留稿

石遺室詩話梅生爲余書扇錄西湖詩數首乙菴諸人
見之極賞其鐘定聲依無際水詩成意在欲開梅諸聯
實則君詩語能自造而出以自然無艱澀之態或病其
隘而不廣余曰以東野之夔絕千古遺山尙目以詩囚
於東野乎何傷

龔九鶴置酒袖海招予看菊

一貧天地無秋色十月賓朋始酒杯紅日旣爲菊花好青山須
就故人來

廣意

紛紛鼃紫攻聽睹坐亂人意令失真適然閒靜理我素始脫蟲
害仍爲人無書嘿坐亦欣喻偶夢得句能嶙峋始知對客有至
苦先不稱意奚疏親我生局脊正坐此胡爲緣物成愛嗔力微
不足攝羣動乃令方寸生荊榛出門一笑吾過矣高雲寥廓無
纖塵

後插菊詞

列燭何知有月明畫堂無客愛更清空庭百本殘秋後留與幽
人伴五更

同霜杰入杭

始發意已遠江聲秋杳漫紅舡非不小人意自然寬蕭散斯風
致山林見肺肝平生輕世事孰信一游難

入杭舟中雜詠

江聲爾何恨入夜殊怒咤青山絕有情船頭紛來迓
家家門前樹樹盡臨江看盡江船過紅樓人倚窓

仲春客邸日課山水一紙非云習畫聊資遣悶爾

歷游佳處輒追尋邱壑何資意自深如彼枯槁消永日向來粉
墨耗雄心拋離竟比投荒去慷慨猶餘渡海吟虛寫江南煙水
態好春無日不輕陰

荃庵累月無書詩以懷之

吳雲秋轉繁南望迷未瞭鷺江吾有人羈旅同爲飽擬貌訊近
肥探衷見前皎春書密似櫻秋事疏于蓼向時朋舊盡彼此亦
半老焉能不我思狂酒臥煙島

題所畫蓮花

畫蓮不作春花媚宿鷺遮魚致自奇一畝野塘天乞與東風何
力未曾知

里橋晚坐

橋盡山幽處山迴與寺鄰樹冬多古色野暮有行人邨戶工鋤
酒歸牛穩負薪故鄉情自好佳氣恐難湮

鶴澗小坐

澗在理安寺之前千松萬竹高翠聳天真仙境也

地天忽自通一碧不可絕舉眸悚陰森恐入神靈窟萬篴爭奮
挺叢櫪皆聳拔橋行俯寒澗自古流蒼雪惜惜琴思生冥冥鶴
迹沒出山衣蘚香湖光漸不滅

理安寺

百澗競成響一潭私自激縈苔下絕壁小甃爲幽亭聲外尙含
秋意中欲無僧久坐聞香氣何必存禪名江湖流濁世湍激何

時平真當守此水心根同孤晶

紀別

佳蔬侑晨餐臨行食欲噎中歲別衰親誰能腸似鐵去爲就食
鳧忍託壯游說去年謂今年家居戒不出今年如去年嚴裝催
早發今年視母髻又白去年髮小舟凌夜行大舟旁午發海水
自彌天兒心惟繞膝

偶題

何因成目值片晌念依稀水靜如留影花暝不辨衣樓臺橫海
色車馬亂晴暉一醉仰春宇歌塵雲際飛

夏夜

夏殊不淺氣猶寒夜豈忘深睡故難小具杯觴惟勸影了無蹤
跡與追歡蕭蕭葉吹能爲雨灑灑梔香乃勝蘭待和魯娥舒短

嘯年來寸緯已拋殘

鼓山靈源洞同荃庵公望看月

松去月盈尺月高松影圓不風秋自籟臨水屋如船綠欲浮山
去寒都集曙前披衣商瘦句未抵淨名賢

鼓山達摩洞憶碧琴

古洞受江色無雲常夜光松梢片帆白簷上一星黃此際禁寒
坐青天欲語忘七年懷舊夢獨繞佛前香

登鐵堦

雲痕變滅一興亡鈴語沈沈碣草荒立馬城陰高處望堦尖留
得古斜陽

所居牕前種竹數竿

簾前竹數竿肥瘦雁行列幾時病掩牕所種喜都活寂寥取有

慰後時恐難別及茲未別時坐對忘移日

舟行曉望

櫓枝搖及曙光柔星落漁燈淡不收
舟宿向來能早起沙頭猶有睡鳬鷗

尋靈隱寺

小船通密樹樹裏更藏橋
港縮霞光直山冥日氣焦
竹香連寺遠石骨爲泉銷
佳處吾能奮曇天路未遙

喜晴

可有朝陽意山頭隱薄紅
已銷草根雪真託夜來風
遠水餘寒滿長天曉夢中
一游觀變態晴雨小窮通

孤山獨坐雪意甚足

山孤有客與裴裒
向幽亭藉綠苔
鐘定聲依無際水
詩成意

在欲開梅暮寒潛自湖心起雪點疑隨雨脚來一飲恣情宜早
睡兩峯曉待玉成堆

孤山曉望

菰蒲聲中見人影殘月瘦竿挂笭簪翠禽摘水作花飛一行都
上風篁嶺欲曙湖心天轉黑寒松無風如塏直是誰喚起海霞
高紅抹峰南轉峰北

對菊

牀前置疏花枕上雨聲好欹枝出整葉無一令人惱向來強對
客異趣損懷抱始知古幽人刻意憐芳草

冷泉亭

枯冬貯春青含氣發靜秀巖花附松篁霜雪壓彌茂下有一泓
水風吹碧煙皺寒林寫猿思數葉石塏後斜陽與之紅向空見

明瘦昔夢落何許片雲臥晴岫抒懷誦賸詩倚冷坐移晷

上海寓齋留客夜談

散鬱無端恣謔譚相看已倦更清酣門前雪滿不須去枕上鐘
殘猶可貪積憤撐腸歸雅吐凌寒摩背約幽探姓名早謝人閒
識甜苦心知此二三

步尋靈隱寺書所見

長松老鬣交空翠晚稻秋香打晴穗人家樹頂偶鳴雞草徑風
前有遺毳寒流細石引人深遇澗逢橋聊一憩鈴聲沈沈出煙
際小隊香籃馱細騎野翁山行盡櫛笠越女村裝亦高髻風傳
唄語驚葉下三竺相聞隔秋靄我生于佛不知虔偏近僧居足
吟思興來倚石立移時看竹聽泉忘入寺

孤山舊游處重來仍居此地感賦

別杭未兩載我老湖逾碧不知湖上山識否前游客臨流一顧
影衰槁成春色我顏非被酒對景神自懌始知煙水氣足蘇秋
士瘠孤山尤芳靜勢與前湖隔小榭裏晴漪空廊耿虛白寬襟
理前夢嘿坐試秋夕昔來梅繞簷今來月照席惟有勝遊心不
隨景光易

又

靈隱寺門溫舊路冷泉亭上似前生臨風坐久澗花墜欲暮吟
成山靄生完翠自春知佛意停漪餘響放雷鳴猿公去後經香
絕爲我蓮天問月明

當席作

晚識芳菲恨春懷換故吾蹉跎聊掇擷辛苦事歡娛積礪容消
酒高歌或勝吁紅牙真解意一再按吳趨

湖口數峰奇峻漸乃平衍

世路誰能測巉巖總待平江流依岸勢山意見人情衆綠森初
夏迴紅照晚晴薄游還乘興辛苦定何營

大風雨

昨宵早省天氣惡青蟲圍鐙撲花落五更鄰樹嘯天風一雨新
涼滿江郭積水浮階成小池石榴花墜紅離披水中瘦草出細
葉宛若蘆芽搖綠漪林間有鳥翠毛濕饑不欲鳴仰頭立爾豈
無巢乃避此欲施之食飛忽急西來一片雲尤黑影入疏簾作
暝色欲書詩句索明鐙更檢漏痕妥行笈天公旣雨底用晴雨
中人意尤蕭清閒聽却憶春前夢宿火紅氍毹愛此聲

營睡不成聞鄰房薛翁鼾聲書此

鄰翁談笑方未已貼枕鼾聲已雷起如馳熟路駕輕車黑甜鄉

遠翁能邇吾聞至人以踵息神與天游魂自適其餘蠢者生不
靈槐蟻蠕蠕同一國世間只有苦心者一夢能甜古難得我生
不怨漫漫夜何取將心與睡敵影形相贈大有詞枕簟於吾略
無德明月既墜天垂星短衣緩步游中庭風吹露樹聞葉馨夜
氣殊佳視晝清翁自美睡吾須醒人間勞逸無須平

和內子對菊

紅葉寒山思不禁黃昏小閣動清吟細將肥瘦量今影迸以歡
愁理舊心剪燭與君消好夜彈琴何處起秋陰釵頭瓶上相思
意未辨花人孰淺深

以茶葉饋鵲潭並詩一章

鵲潭理蹟時黽勉事詞翰壞帙盈巾篋細石羅几案苔甕儲澗
汲石竈足薪炭濤聲滿草堂風影蒲葵亂鳳文青龍斑清晨自

獎勸有時摘黃花髻與膽瓶半起舞影婆娑蟋蟀助清歡任真
任酣嬉秋色競爛熳其詩瘦而天與俗肺腑判能以情勝才善
讀愈璀璨丈夫未遇時何止泥沒肝君得自娛理誰亦能謗訕
秋山今可遊與子一蕭散更攜所嗜茗松火煮寒澗我能質短
墨作子茶經贊

高昌廟獨步看柳

曳日搖風意不禁長堤徐步盡千林年時莫怨芳華歇得庇行
人且作陰

黃家樓上林樹蒼藹宜夏賦此贈儲齋

樹影爭入樓迸綠塞牕牖時挾車馬聲遠作風雨驟尤宜五六
月秋氣私夜晝展簾涼鋪玉吹簷暗疑溜我來賦蕭森展眺不
覺久樓閒人意寬短句輒勁瘦天風颯然來燈火林際漏夜深

如有聞墜露香零袖

寄狷生潯陽

客行迨不復洪州強謝君言祇益愁

君云與僕迨不復南昌行初謂然

會面有

期須好抱冥心自詭忘前游書來仰日常移屋花發題詩定滿樓覓夢欲長宜盡醉江流到海更江流

雨夜與墨泉時君赴粵

風威晚不霽雨力夜逾猛垂天洪濤傾擊瓦怒馬騁雜以松竹喧翻使羣囂靜念當羈旅中萬聲集孤影斗幄卽荒巖夜氣悚淒冷家居偏愛雨深簾燭花耿敲詩倚暖枕漉酒熱春鼎靜憩覺勞生况味此細領倦矣閱江湖行復背鄉井思我舊游侶歡悰非往景各有白髮親所期勤定省聞君亦有行壯懷希一逞朔雲驅京華南花踏五嶺苑枯安足計貧健亦多豸有如小稱

意告慰約互竝明當攝兩屐離杯略醕酤

病起放言

景光經病得良題詩筆求新只舊蹊不死故應磨爪嘴浣思無處着塵泥性餘貽蕩終難抑意各沉酣莫漫詆開口今晨向山笑仰頭秋色與雲齊

樓坐

穴牕受日散朝寒盎水培花注夕乾吟逐春新忘髻醜醉呼客去愛樓寬讀書簡欲尋歸宿涉世難疑度石灘消息沈思何不可未能雷動且泥蟠

燕燕樓爲陳敬如作

燕燕來何處高樓結翠叢美人將小字攜手贈東風柳帶雙心綰筠簾並語通多情蓬島客點綴費春工